





聖宋名賢五百家播芳大全文粹卷三十三

謝表

謝降官知耀州表

范文正

臣某言蒙恩降授臣尚書戶部員外郎依前充龍圖閣直學士知耀州者寔負大尤尚從寬宥雲天之覆頂踵何酬臣中謝竊念臣才不迂疎識非機敏屢由狂率自取貶放朝廷以邊有擾動是使愚使過之秋微臣以國有急難當忘家忘身之報自膺寄委罔敢



遜避而力小任重智小謀大勞心已竭處事愈乖苟  
利國家不恤典憲宜及于禍以貽厥羞伏蒙 皇帝  
陛下日月照微天地包廣謂千慮之智猶有一失萬  
物之材固無全用軫茲孤弱播于生造削其官足使  
明大戒存其職足使思後圖臣敢不更勵疲駑愈加  
修省庶陳纖芥之効上答高明之私臣無任云云

謝謫知徐州表

曾文昭

懷章去國不啻三年荷橐入朝未淹百日復棲遲於

民社驟違遠於闕庭迺義理之當然豈人情之所願  
竊念臣秉性固陋承學迂疎懷是古之至愚抱守官  
之獨見豈特難堪於世固已不善於身謀昨者召自  
留都處之宗伯屬郊丘之肇祀議天地之經祠執禮  
雖明趣時則戾已行之合豈孤論之能回不韙之誅  
敢偷安而苟免旋抗章而請臯蒙易地以示恩繼露  
微衷復班溫詔終賴乾坤之造曲成犬馬之私假以  
使符置之善地循行閭里固多魚稻之饒周覽山川



頗有江湖之趣夫何孤蹇獲此便安此蓋伏遇 皇  
帝陛下寬裕有容包含徧覆將以招致芻蕘之論是  
用特寬斧鉞之威伏惟恩慈豈易報稱臣身雖在外  
義不忘君况仰賴於皇明忍自愆於素守深念長人  
之寄知無不為益堅許國之誠死而後已

謝謫知宣州表

曾文昭

信而後諫愧無平仲之言罪不容誅誤託成湯之網  
屈嚴科而賦命畀善地以竄親聖澤隆寬自古未有

愚心感激欲報何從伏念臣蔽蒙之久迂濶於事以  
直道為敬天之實以詭精為駭俗之非殺其身有益  
於君行之無悔見其利不顧其義死莫敢為知萬折  
而必東故三已而無愠汲黯之戇竄免世嫌子文之  
忠蓋出天性切服兩宮之知遇稀希八彥之激昂故  
有橫逆之來曾無左右之助口欲清而愈濁外無正  
而不行徒傷忠敬之難明亟比欺誣之重坐既免投  
于荒裔乃擇處于近藩風俗休戚在所漸摩朝夕旨



甘得其順適道固隆於善貸恩尤著於曲成此蓋伏  
遇 皇帝陛下聽德惟聰使臣以禮兼洪覆無私之  
運均大明徧照之神謂好言利病者有區區憂國之  
心謂不事權貴者非汲汲謀身之輩方免官而從眾  
竟薄責以勸忠臣敢不敬體惠慈退加修省凡正心  
而誠意必明辨以篤行金石可磨祇慎之臧之達節  
死生不變庶幾徐邈之有常殫夙夜治民之勞全始  
終報上之意

謝知信陽軍表

范堯夫

喧訟亟興駭人情而莫測誣辭終辨蓋天聽之難欺

恩從推究之明感極矜容之大中謝竊念臣性資愚

淺學術迂疎仕緣家世而聞進乏左右之助先帝慎

臺閣之選嘗被甄收陛下求諫爭之臣首叨東拔自

謂大恩之難報誓竭忠勤詎知適道而寡權動貽悔

吝暨屢蒙於器使卒無取寸長僅同鼯鼠之五窮徒

過古人之三黜向由罪戾之迹驟當帥領之名詔命



初頒已致有司之駁議懇辭弗獲遽承中旨之促行  
果貽負乘之羞自速簡書之謗內幸朝寄外辱將權  
省愆甘竄於遐荒屈法至煩於全度此蓋伏遇 皇  
帝陛下堯雲溥覆湯網廓開記憐舊物之微濶畧小  
臣之過止鐫閣籍尚畀軍麾矧松檟之匪遙復土風  
之不惡田寬穀賤民樸訟稀蚩蚩本樂於太平斷斷  
或成於靜治庶收來效少塞愆尤臣無任

永州謝表

范堯夫

臣某言准告責授武安軍節度副使永州安置已於  
今月十一日到永州訖孱愚誤國痛往咎之莫追聖  
哲當天詎明刑之可逭曲從寬典止竄遐陬泣血銜  
恩隕心知罪 中謝 伏念臣器能淺陋學術迂疎藉闕  
閱之餘資竊朝廷之顯仕度才量力每深負乘之憂  
冒寵叨榮果積山嶽之釁擢髮宜尸于兩觀分符尚  
玷於一麾未正嚴科難逃公議諒惜陞廉之體特寬  
斧鉞之誅貸其桑榆以禦魑魅身縈篤疾已傷兩目



之盲舟覆長江僅救全家之溺既緣自取為幸猶多  
此蓋伏遇 皇帝陛下日月照臨乾坤覆載法比漢  
章之約仁同湯網之開矜臣簪履之餘曲加涵育憐  
臣帷幄之舊尚俾生全致是疋殘苟延視息臣敢不  
刻肌遷善沒齒思愆永同湖海之民均被唐虞之化  
餘齡向盡唯冀於首丘洪造未酬敢忘於結臣無任

海州謝表

田表聖

臣錫言伏蒙聖慈以臣蒞事疎遺錄問淹滯尚寬恩

宥責授檢校右騎散常侍海州團練副使已於今月

十一日到州訖祇膺朝命感懼難任

中謝

臣聞懲勸

欲行賞刑必正示無私於天下表至理於區中寔聖  
明所守之先綱紀有常之始臣素無才識本乏聲塵  
每念生於劍南鄙在草野父母訓勵早令讀書鄉里  
薦稱遂謀干祿相繼數舉未成一名泊朝廷書軌混  
同文物光被臣始攜待老幼涉歷艱險往來咸秦羈  
旅京闕值 陛下嗣登寶位振起儒風微才不遺羣



英咸至臣年三十九及第便授官資達不因人驟升  
華貫閣下三載每愧忝塵淮陽二年遂致遺曠據其  
罪戾合竄遐荒尚蒙宥過之恩俾列副戎之秩東海  
之郡去京不遙南風之薰順流而下程途自便骨肉  
隨行罪重責輕恩深感極洩涕知幸驚魂省躬循遇  
咎之所因荷生成之罔極披陳愚懇雖在表章叙罄  
感懷合貢歌詠謹奉表稱謝并進五言感聖恩詩二  
十三韵干冒宸嚴以聞

謝監衡州鹽倉表

劉莘老

議令獻言知典刑之無赦原心觀過荷仁聖之有容  
貸其餘生處以善地伏念臣稟生艱拙遭世盛明學  
不能窮理而知幾財不足趨時而飾變晞名途以孤  
進濫文館之末遊和鉛何功索米逾歲間承人之偶  
攝掾於中堂旋誤聖知使備員於憲府仍職書林之  
舊就行御史之中始自愚臣前無故事方陛下繼承  
於五聖而國朝平治者百年力勤肯獲之田大解不



調之瑟菟拔羣材而審以器變使百度而曠然日新  
臣於此時職在言路誓殫忠義敢避勢權竄以孤睽  
訐切拂眾而身危不忍從容倡 負恩而速進狂愚  
自信裨益無功故宿官之日幾何而瞽言之罪非一  
至如均民而弛役因之率戶而出眾雖慮始樂成者  
愚人之不知然損下益上者先王之大戒輒條十害  
冀補萬分議臣見疑以為敗謀而亂化清衷獨見知  
其有責而盡忠特徇以誠止容其去褫臺閣之二職

置瀟湘之一隅有祿食使之存全有職事可以報効  
銜恩載幸揣分增憂此蓋伏遇 皇帝陛下察臣孤  
忠全國大體不惜骫一夫之法庶幾留眾正之門謹  
當上體恩仁期於必報下堅節義死而不渝

謝降官表代

晁之道

職在撫綏事當脩預弗謹授衣之令仍稽奠賈之期  
合即嚴誅止從貶秩厚恩莫報感涕徒揮 中謝伏念  
臣稟資甚愚涉學至淺但期立事初不為名適濟明



時遂參法從徃再塵於重鎮思勉効於寸長旅力既  
愆智能又寡昧詔條丁盜之訓忘將士黻彖之虞辜  
負使令一至於此思惟罪戾胡可勝言保身入恃於  
好生竊食尚叨於逸老此蓋伏遇 皇帝陛下至仁  
廣覆惠澤旁流俯矜不逮之愚曲示惟輕之典病瞻  
天日彌懷顧影之慚老死丘園終負裹尸之志

謝罷給事中表

胡文定

伏覩臣僚上言以臣不合辭免恩命乞賜黜責為人

臣之戒奉

聖旨前降給事中指揮更不施行者宿

疹沉綿稽違成命巧詞彈擊寢罷新除成邇在顏感

深銘腑

中謝

伏念臣稟資至陋得數多奇徒險阻之

備嘗未悔尤之能寡早年擢第歷仕四朝晚歲蒙休

叨官二省值強虜憑陵之際輸從臣獻納之規頻觸

權豪坐貽澄斥間關千里慘淡百憂但驚疾病之益

侵豈復恩榮之敢覬寶圖有永神武中興得人欲濟

於艱難取士不遺於羈散召自荆扉之陋超居鎖闥



之華劔佩相磨風雲初合自嗟薄命獨負危病恐顛  
踣於道塗遂傾祈於旒宸未回隆渥已噴煩言假如  
侶楚澤之蟲蛇託生蝸舍孰若綴周行之鴛鷺平奏  
鸞臺身陪鳴玉之班腰束橫金之賜本非失性素不  
病狂忍干慢令之刑乃要流俗之譽毀深銷骨自昔  
興嗟德大包荒于今為幸伏遇 皇帝陛下堯仁天  
覆湯聖日躋廣施雨露之恩特霽雷霆之怒俯憐孤  
跡免寘大懲敢不念切知非動思觀過處衡茅而守

約勤藥石以扶衰謂不謹前益當善後廢而可起倘  
溝壑之未填志或稍伸冀涓埃之能効

謝謫黃州監酒表

張文潛

矜其多病祿之仙聖之祠誅其積愆斥之筦榷之任  
雷霆既震螻蟻曷逃罪大責輕感深涕隕中謝伏念  
臣粗親翰墨篤好文詞曾未窺其藩墻妄見稱於流  
輩浸蒙寵祿頗躡等夷久讎中祕之逸書與記漢家  
之故事入符帷幄曾未歲時而疾病侵凌精神疲耗



一辭螭陛兩換虎符茂聞報政之能徒幸養痾之便  
投閑置散於分為宜號寒啼飢其窮已甚方大明於  
淑慝固無遁於誅夷唯是齊安近在淮右雖薄加於  
黜削乃猶即夫便安非大明之燭幽顧微生之何恃  
茲蓋伏遇 皇帝陛下至仁溥及盛德好生謂刑以  
正邪用之初非獲已而罪非極惡議之必傳惟輕遂  
致夙愆猶逃大戮臣敢不敢心思過擇地圖新駑馬  
已疲久息鏘鸞之望秋葵未殞常傾向日之心苟一

介之有施終九死而無悔

謝謫南京通判表

晁无咎

小己下僚昧於職守盛時公議特此貸全未使廢閑  
猶叨安便媿深汗溢感極涕橫中謝伏念臣家世凋  
零在朝廷者無幾人材闡茸所學問者又非猥迫寒  
飢出營仕進本自安於常調固絕望於亨塗庶幾孤  
愚不越分量而偶弼臣之一薦濫文館者十年初無  
毫毛得被驅策徒累資任以致麾符臣自揣思久當



顛沛加以祚薄多故器小易盈不能恪居於其官遂  
使咎生於所忽幸仁聖矜其如此故迂踈尚以并容  
第解郡章旋霑祿食將母之幸於臣已多德大施隆  
身微命賤成遂莫悔啟處若驚共惟 皇帝陛下明  
目達聰與人為善畢修祖宗之舊政遍攬中外之英  
材建官惟賢宥過無大雖憑生之螻蟻亦蒙賴於乾  
坤臣敢不謹畏自新忠誠內誓念洗心以償罪譴既  
負負無可言思發憤以赴功名又區區不足道報恩

無所辟首為期

謝謫兗州通判表

晁无咎

咎悔難追一更寒暑嫌疑自列敢憚道塗再服寬恩  
重增感涕 中謝伏念臣粗知學問本乏材能仕豈為  
貧慚居卑之亦分家雖善積傷餘慶之已微嘗念居  
不可以求安福孰先於無禍故六年遷徙甘常困於  
米鹽而羣從凋零祇自憐其形影未敢當江湖飛集  
之數何足掛朝廷論議之間每欽宥過無大之仁則



思見危授命之義未試以事孰明此心諒與釜之已  
多誠挈瓶之何有但知揣己皆是踰涯恭惟 皇帝  
陛下惟時憲天常善救物稽先朝之美意與治古以  
同興謂蕩蕩民無能名佑啟我以正故業業日致其  
孝繼序思不忘蓋欲得萬國之歡心足以歛五福而  
敷錫雖甚微鄙不終棄捐重念臣頃迫養親久從補  
外昨由公坐得譴止以佐官連書亦既累年實更三  
赦事雖自致情則無它庶省循苟免於人非或湧洗

稍容於國是犬馬能報况服冠裾擣櫟無堪猶供燔  
燎終自知其死所不敢愛於身先

謝謫知滄州表

李成季

禮官失職甘俟嚴誅邊壘折符尚叨優寄以不可貸  
之罪蒙非所望之恩驚魂既還涕零無已 中謝 伏念  
臣迂疎無取選輒不持惟知任物以直情不慮周身  
而避患每事必問已失仲尼之前知三思乃行終違  
文子之常誠一昨奉大母因山之制謹百官趨事之



期夙有司存各以類舉逮壽宮之易奠道虞主以告  
行竟達空函幾敗乃事既身為之官守反自闕於禮  
文仰誤神靈之依中撻仁孝之感過莫大者誰其歸  
之固當戮以市朝可復付之民社眷浮陽之封壤控  
北虜之喉襟澤浸際天雖馬牛之弗及風聲屬耳實  
鷄犬之相聞宜得望人以壯方面敦詩說禮鎮以靜  
安緩帶輕裘應之閑暇况乃大河泛溢之後一方飢  
窘之餘必先謹養以惠和尤在周知其疾苦如臣孱

暗非所克堪伏遇 皇帝陛下天地同仁日月齊照  
澤及行葦每思視物以如傷網漏吞舟不忍向隅之  
獨泣聊褫官而示罰猶守土以長人臣敢不砥節奉  
公肅心悔過盡為臣之道於事無難推愛國之心以  
民為本誓殫夙夜少補毫分觀海知瀾宛隔蓬丘之  
望舉頭見日長存魏闕之心

謝謫定州通判表

汪彥章

眾惡必察宜即嚴誅罪疑惟輕止從薄責哀哀誤登



於臺省漂漂復返於江湖中謝伏念臣家世故寒材  
能特陋切慕古人之力學偶陪多士以進身編蠹簡  
之十年最為推鈍隸鸞臺之一月俄致顛躋由非才  
冒處於必爭故公論不容於交擊猥煩簡札有玷簪  
紳尚依魚稻之鄉獲近粉榆之壤若非洪造豈有餘  
生茲蓋伏遇 皇帝陛下博採智能疏觀情實謂虛  
船觸舟而褊心不怒難以無他然強弩射市而薄命  
先遭莫非自取姑捐稍廩使治妻孥臣敢仰佩訓懲

俯深循省日嬰薄領甘為俗吏之沉迷坐置銘詩誓  
復平生之玷缺

謝降官表

蘇子由

罪大恩寬言者未厭官高德薄法所不容尚領真祠  
實出寬憲中謝伏念臣早塵近列無補明時下則拙  
於身謀上則闇於國體先朝矜其愚陋宥以遐荒前  
後七年浮沉萬死偶真人之御厯敷大號以惟新普  
復舊官亟叨厚祿然臣年迫衰暮知復何為身利退



藏顧未敢請因循於此黽勉自慚雖復追削者五官  
仍且獲安於閑局涵恩至厚為幸已多此蓋伏遇  
皇帝陛下以堯舜之仁行成湯之政衷未忘於舊物  
恩許畢其餘生臣謹當杜門躬耕沒齒蔬食知生成  
之難報姑靜默以待終

謝降官表

李成季

臣某言八月二十二日都進奏院遞到告一道特降  
授承議郎差遣勳賜如故臣尋跪受訖禮官被黜方

在退思勅局示懲止從薄責薄干文憲疊負豐珎撫  
己奚慙感恩零涕中謝伏念臣斷斷不敏碌碌何知

初無竒警以動人每以疎愚而取禍詩禮之訓幼則  
嘗聞刑名之書素所未學偶預都司之進擢適當常  
憲之變更宰府付以官僚惟命所赴法吏摘其紙尾  
謂可則書文既失於舊章罪寔逃於顯戮止從貶秩  
尚玷承流雖天地無所不容而犬馬何以為報此蓋  
伏遇 皇帝陛下聰明睿智以獨斷慶賞刑威之必



行遵制揚功永懷善繼亂名改作先務誅謹謂使人  
知過則能盡其忠故用罰以寬而終歸於恕臣敢不  
省身夙夜砥節事功知無不為庶竭事君之義死而  
後已益堅報國之心

謝分司蘄州居住表

劉莘老

伏讀訓示俯循罪跡理不容於萬死恩猶畀其餘生  
祇命奔馳悼心隕越伏念臣羈孤無助勤苦自為承  
家本出章句之儒所望不過州縣之吏偶緣人乏獲

預於政機寔以次遷遂塵於宰席以嬰缶之器而渡  
江漢以翺蠕之力而負丘山空端一心曾無遠慮待  
罪期月而已固嘗不勝於人言去國三年於茲終至  
再煩於朝論覺惡暴列彈劾交興擢髮不足以數罪  
辜伏蹟不足以謝公議敢累好生之德曲推念舊之  
仁祇令分務於別都更俾安生于善地咎深謫薄感  
激涕零此蓋伏遇 皇帝陛下同德昊穹紹休前列  
記臣久侍於帷幄憐自臣蹈於典刑昔常察其所安



未忍置之於理如犬馬簪履之賤猶弗棄之雖天地  
父母之慈不過如此臣敢不省非內訟刻意自新往  
咎莫追長負誤朝之愧來日無幾尚堅糜骨之忠

謝分司表

余安道

臣某言與奪者朝廷之大柄出處者人臣之大方成  
命自天退身得地中謝伏念臣鄉邦遐遠世系孤平  
偶自童觀即親儒術尋師千里備歷險艱志學十年  
迺得科第國家頒制目以求士開文館以待賢人之

非才咸預茲選每守孤直不事貴權蓋嘗忤旨而謫  
官尋亦知名而見用降發中之詔擢居諫諍之聯以  
出疆之勤延登侍從之列願宣忠力以酬萬乘之知  
屢被國恩自忘五股之賤多所論列罔畏仇嫌臣既  
拙於周身毀者得以銷骨惟期退避屢抗表章帝座  
雖處九重之深皇明遠照萬里之外預頒明命克遂  
初心此蓋伏遇 皇帝陛下天覆無私乾剛獨斷念  
臣嘗經驅策不避艱危察臣本以公言構成私隙俾



從散秩歸奉所天下以成微臣就養之勤上以全陛下退人之道丘山荷賜永炭在懷

代崔憲謝降官表

蘇叔黨

繆於刺舉以干越職之誅尚賴寬仁止就削官之罰恩深責薄感激涕零伏念臣賦性顛愚逢時休戚雖屢膺於指使終無補於涓埃惟恐有聞欲效鷹鷂之志自貽伊戚不虞尸祝之訛果蒙定罪以原情聊示小懲而大戒仰天知惠撫己懷慚此蓋伏遇 皇帝

陛下躬若稽古之明行不忍人之政祖成湯之三面達虞舜之四聰吏議難逃蓋自不安於分守天心灼見猶許改過於將來臣敢不奉以周旋永知教戒服勤官政期收薄效於桑榆銘刻肌膚莫報大恩於天地

謝降官表

韓无咎

外臺披戾難追於深文中詔施仁第從於寬典恩隆命薄感極涕零伏念臣猥以庸材叨塵輔郡野無青



草適歲事之荐飢戶有屨渠復土風之善兢慨疲駑  
之既竭慚尺寸之罔功財貨未贏陽城之政甚拙教  
條靡善延壽之過自知至於報應或繆於文移請讞  
務仲於法令重貽刺舉宜在譴訶羸瓶之寘井湄蓋  
有擠而感者弊車之避道左是宜麾而去之敢期覆  
燾之深曲示保全之厚就移職守特損官聯此蓋恭  
遇 皇帝陛下湯網務寬舜璣惟察念臣久更州縣  
常自信其迂愚憐臣昔侍禁嚴每洞知其拙直刑於  
捐之所

謝龍圖閣直學士致仕表

樓大防

善貸責以後來臣敢不仰副殊私益堅素履雖桑榆  
之收暮景莫知補報之方若葵藿之傾太陽尚有糜  
捐之所

致大夫之仕仰賴矜從進學士之班弗容避免念餘  
齡之無幾幸晚節之苟全量小已盈感深至泣 中謝

伏念臣學徒泥古才匪適時三列皂衣寔叨嚴近久  
塵青瑣遂積愆仇敢自詭以治民為專求於奉母侵



尋一紀孤苦再期耄矣無能每媿祝釐之廩仕焉而  
已况逢告老之期洵貢封章遠投君父喜下情之上  
達荷人欲以天從誥頒東海之濱職峻西清之直鹿  
車還里難忘貧賤之時龍馬負圖乃昇衰殘之候何  
夢寐之敢反亦家世之所無茲非幸歟不翅足矣茲  
蓋伏遇 皇帝陛下德新惟日仁覆如天俯眷么微  
忝螭陸隨班之舊更憐甌噐當龍飛草詔之初尚問  
生全不忍遐棄聿頒茂渥式賁窮途臣敢不內誓丹

心益堅素節退人以禮已增鏤骨之私教子以忠使  
效捐軀之報

代劉給事謝復祕閣修撰致仕表

韓无咎

竊食真祠久逼桑榆之暮拜恩內閣遂榮田里之歸  
揣已踰涯荷天從欲伏念臣奮身寒遠賦分奇窮從  
六藝以決科僅而得仕接諸儒而奏披晚特逢時頃  
由憲府之聯獲冒書林之選螭坳載筆嘗預記於王  
言鳳閣判花復濫司於帝制進膺瑣闥數侍清光乃



遽速於顛濟迄自投於閒散鄉閭作佚既閱十年香  
火無功殆逾數任惟是衰殘之質寢登耄耄之期力  
已弗任無復為駒之意老將奚道徒懷化鶴之悲祇  
有布其腹心庶自乞其骸骨豈期睿眷特賁殊私稍  
還論述之名俾識退休之寵義兼念舊恩出再生茲  
恭遇 皇帝陛下簪履興慈蓋惟示軫欲曲全於小  
物肆迂照於容光謂臣麋鹿之姿豈軒裳之是適憐  
臣犬馬之齒曾鐘漏之幾何許以傳家尚為報國臣

敢不効忠自勗守道弗渝擊壤而歌唐虞預識豐年  
之瑞閉門而詠周孔益知化日之長

謝落職罷宮觀表

樓大防

杜門卻掃幸家食之少安褫職罷祠忽臺評之下及  
尚從寬典祇荷隆恩 中謝 伏念臣鷲直有餘頑冥自  
信生逢昭代屢玷周行年除歲遷實由於親擢左提  
右挈敢藉於先容久居封駁之司幾作怨仇之府用  
過其分思稱所蒙始求補外以牧人已叨臨遣旋請



投閒而奉母又辱矜從五年自放於江湖一飯不忘  
於君父獲棲故隱可謂幸民然猶通內閣之清班竊  
殊庭之厚祿餘生何有惟斷斷以無他公論弗容尚  
斷斷而不可煩言果至百謫奚逃仰聖度之恢洪閔  
危蹤之孤露爰施薄罰以示小懲茲蓋伏遇 皇帝  
陛下仁務包荒爵惟馭貴衛纓雖許終不可以假人  
漢印既銷適足明於無我俯憐簪履之舊猶齒搢紳  
之間臣敢不屏息訟愆投誠戴德循南陔而戒養退

甘三釜之貧望北闕以傾心莫效一毫之報

謝落職表

樓大防

孤臣失察盍寘大阿上聖隆寬止從薄責俄自天而  
有幾無地以容身中謝伏念臣生則多艱仕皆過分  
幸遇千齡之會寢叨八座之聯歸奉祠庭猶寓西清  
之直坐縻廩粟不勞南畝之耕頃蒙乘障之除庸示  
起家之寵方循墻而引避痛陟圯以纏悲顧平時藏  
拙之最深矧游歲執喪而致毀猥緣親黨非意相干



不善防閑自貽伊戚仰公朝之矜恕念舊物之顛連  
褫學士之班再斯可矣使臣工之肅其在茲乎迨釋  
服以及期敢陳詞而謝罪茲蓋伏遇 皇帝陛下冕  
旒無蔽簪履不遺以天地之心為心何止國君含垢  
之意謂兄弟之子猶子真得真人觀過之仁遂干危  
蹤止用輕典臣敢不闔門念舊望闕歸恩三黜何言  
但有動心忍性之戒餘生無幾徐上引經告老之章

謝新州安置表

劉莘老

上負國恩自干罪憲悔心追悼感涕莫收伏念臣以  
一介之微叨四朝之祿當大明之繼照由外服而賜  
歸厯塵近司寶奉初政心貪榮利久竊位而無慙識  
諳事幾日播惡而不悟仰累任人之哲自貽誤國之  
愆置散投閒固公言之未厭後咎餘責謂顯戮之必  
申尚蒙異恩聊復遠斥此蓋伏遇 皇帝陛下好生  
以奉天地任德以法祖宗載加震曜之威備示存全  
之澤譬父母之譴其子或賜矜憐然瘡癘之逼于身



何能淹久儻厚德之可報誓孤忠而弗渝

謝謫永州居住表

汪彥章

孱愚冒寵久仰日月之光盈滿挺哉自處雷霆之下  
蒙聖恩之寬大與善地以生全罪大心寒感深涕落  
伏念臣初無稱道積有悔尤所當退養於疲瘵乃復  
寢成於老諄忽聞威命適在窮途冒風雪以疾馳越  
江湖而跼伏非恃冕旒之察難逃鈇鉞之誅茲蓋伏  
遇 皇帝陛下剛健法天聰明稽古干戈不用再臻

全勝之時刑賞何心一付至公之論而臣靡思兢慎  
仰負函容餅居井眉雖有措身之地孤正丘首未知  
歸骨之期

謝出籍表

李成季

滌瑕蕩穢共承雨露之霑濡振衣彈冠莫知手足之  
抃蹈追惟前日感涕厚恩 中謝 伏念臣生也有時仕  
而無學智識非遠議論甚卑每慚事往而知非不悟  
才疎而多累兩干吏議三巧宮祠顙白不可以適河



猶叨養惟獎或堪於累馬未即棄捐間者上帝降  
康天祇薦瑞脩成寶刻均福蒸民敢期負釁之餘生  
亦預竄名於載籍此蓋伏遇 皇帝陛下愛仁無已  
視物如傷賞罰之公時乃天道予奪之節本於人情  
謂法以示懲既已屢更其歲月過而必改誰將自棄  
於君親曲示函蒙一從湔拭而臣計功無取蹈悔良  
多載省始終莫酬萬一蓋嘗喻父老以戴上之美意  
教子弟以事君之小心長歌天保之六章百拜封人  
之三祝雲天在望但知傾日以為心溝壑未填尚冀  
殺身而報國

聖宋名賢五百家播芳大全文粹卷三十三終



聖宋名賢五百家播方大全文粹卷三十四

謝表

謝復官表

韓魏王

臣某言九月二十七日樞密院遞到告勅各一道伏蒙聖慈授臣起居舍人者謀軍而敗獲罪當然使過以恩勸功斯在寵光所暨媿慄無從中謝伏念臣稟賦顛庸緒迹寒替偶緣末學悞中科甲驟厯榮階繼塵劇任任奉身以直居職惟公逐巧者目為愚夫養



高者謂之俗吏出於聖監擢備諫員荷寵既深獻誠  
必屢刺權豪之失不虞家族之危仰恃含容僅逃放  
逐逮易官注於筆旋書命於詞垣自右蜀告肌高奴  
覆將荐驅儀傳親諭國靈有利輒言無疵不去所期  
還闕少遂息肩朝廷以未殄賊巢方開帥府進預樞  
機之直俾參經畫之權雖兵旅之宜素非習練而人  
臣之節當冒險艱拜命引塗忘軀殉難周旋邊徼蒙  
犯雪霜薦賞武材則罷懦者皆忌徼揚忠憤則苟且

者如讐一昨平涼之西酋虜采寇臣聚師以待定謀  
而行偏校爭先弗遵於節度眾寡莫敵終及於撓亡  
讒胥競搖怨府交發諍臣論事亦謂當誅宸眷念勤  
獨明非謬止從削秩尚委典城惟茲天水之雄式控  
隴關之要氏羗雜處輿賦甚繁臣寢不及時食忘其  
味力圖後效勉贖前辜重表御寒姑自修而作誠積  
毀銷骨寔眾口之未平不謂睿聽通微宸襟錄舊持  
申昭洗亟復舊聯顧蕞質之再生諒煩言之寔弭斯



蓋伏遇 皇帝陛下體天育物以器任人謂獵犬無  
功匪自指縱之悞覆盆委照遽開日月之明庶令負  
釁之臣得遂棄瑕之用敢不精研策慮謹布教條明  
斥堠以謹邊勵貔貅而禦侮收桑榆之來或振翼之  
可期竭犬馬之誠誓填壑之為報臣無任云云

謝復官表

晁之道

曩緣失職稍削文階今載誤恩息還舊物徒揮感涕  
戴激懦衷中謝伏念臣陳力無堪叨榮有覲惟關陝

轉輸之任號為至繁顧江湖樗散之姿宜其弗稱果  
緣曠敗自速譴訶深惟萬化之曲成不以一青而遽  
去仰蒙全度猶玷驅馳曾未蓋於前愆忽戴叨於新  
渥捫心增悖被寵愈驚此蓋伏遇 皇帝陛下盛德  
好生至仁善貸昊穹報况有三靈之薦釐德澤旁流  
無一物之失所肆容疵賤亦玷恩榮臣敢不早夜以  
思造次於是息黥補劓已深愧於生成効命捐軀尚  
冀收於尺寸



謝復官表

陳瑩中

天慈廣大帝詔均平靡容纖介之私遂成普博之施  
恩光曲逮感涕橫流伏念臣稟質下愚積習迷謬屢  
竄皆由於自取百非難逭於人言螻蟻何知身比堯  
天之大鷦鷯未殞命餘湯網之寬甑晚危縱栖遲莫  
景方省循於既往豈叙復之敢期今頓釋於久羈實  
大踰於初望此蓋伏遇 皇帝陛下乾行剛健離照  
融明泯異轍之多歧會眾流於一海此疆爾界齊成

大有之年古律今聲合奏太平之曲致朽株之蒙潤  
由沛澤之不徧簪紱難勝但益履冰之懼筋骸已憊  
莫酬肉骨之恩志常效於傾葵誓敢忘於結草

謝復官表

李成季

天地既交適契施生之序雷雨方作悉霑曠蕩之恩  
歸復官資洗除罪戾莫知手舞但極涕零 中謝伏念  
臣材非過人學不知道濫登仕版誤置書林必有可  
觀未始錚錚而驚世終無他異但能碌碌以同塵逮



躡省闡遽參宰屬偶官僚之有請謂國憲之當更初  
無預於講論漫不思其抵謬罪同破律議在謹誅止  
鑄階秩之微聊殿籍書之末豈謂矜前車之既失開  
局步於自新川澤納汙一歸曠度父母愛子皆出至  
情此蓋伏遇 皇帝陛下堯性生知舜聰遠格庶事  
憂勤而協帝小心寅畏以事天常善救人恐匹夫之  
失所為能盡物期一視以同仁曾是孤生亦蒙感澤  
併還舊物復領真祠官守不出於田廬家殮盡資於

廩粟葵藿之心常在終幸臨照犬馬之力已衰空慙  
養養一無裨報獨負生成雖已寢於桑榆顧未填於  
溝壑猶能中田擊壤日陪野老之歡聲清夜焚香每  
効封人之善祝

謝觀文殿大學士充中太一宮使表

范堯夫

竄逐餘生分永捐於荒服光輝旁燭遽復齒於清班  
望溢中情恩踰再造 中謝伏念臣學非經世智不逮



人荷累聖之深知躡羣髦而驟進召從藩國入奉宸  
居一秉樞衡再參揆路人微責厚恩重命輕徒知竭  
盡於愚誠冀或少裨於聖治恩忘分守冒進煩言亟  
蹈危機曲從輕典屏居湖外屢易歲華疾病交侵厄  
羸就盡陛下昭陞寶祚特霈鴻私嘉與物以咸新視  
前垢而皆滌悉收故物猥及微臣顧罪戾之同時有  
死生之異趨如臣疲病猶是生還荷大施之無涯畢  
此生而寧報何期眷意益服便蕃寵還祕殿之召兼

以殊庭之職招驚魂於百粵薰嘉氣於長長安心游  
魏闕之前夢入甘泉之仗然臣雙眸俱廢寧瞻舜日  
之光一體偏枯永絕堯階之奉自憐衰薄徒際盛明  
濫被休光唯知感涕殊常之遇既不敢以飾辭迫切  
之情亦少祈於俯狗伏惟 皇帝陛下天地大德日  
月兼明欲從不違所私官使必量其度恢其餘照鑒  
此哀誠許令養病於丘樊尚期擊壤於聖世

謝復侍讀學士表

宋子京



臣某言今月十八日馬遞到官誥勅牒各一道授臣  
依前充翰林侍讀學士仍放朝謝者左符待罪方做  
常箴中制疎恩遽還近職被前尤之註謬豔來寵之  
便蕃撫已銜榮無顏容愧伏念臣福祚單狹性局蠢  
煩距躍至愚坯陶上教因隨士夫之課謹脩官學之  
方入直文林進簪侍筆從雞翹之游豫脩虎觀之討  
論薦許為邦俄蒙納節序躋天掖祇演王綸再忝復  
門之游久奉華光之學至於刪定條約豫法家之議

者三年整比京司牧縣官之財者萬計止貪云補罔  
避謗囂仍因摘句之間嘗逮邇言之訪質當今之謂  
利病靡敢度情語前世所以存亡或蒙稱善以孤遠  
之質荷顯印之知播於傳聞寔無妬媚何者一金被  
賞來眾口之毀銷寸的取褒啟百夫之決拾名盛難  
處援寡易危况復因希濶之儀抵忘誤之禁緣為飛  
語遂免至聰所賴公議原情眷慈含垢憫一青之失  
義有相除在三赦之科愚最無害止停嚴直猶屏大



藩曾未半暮亟頒成命舉已除之籍復署禁扉慎數  
易之宜仍留州閣孤心按堵蹇步良行此蓋 皇帝  
陛下養以至仁納之大度恐令久棄俄與自新冒陳  
檄以流膏破幽盆而逗照故綏更飾足追露冕之矜  
新組交垂遂免寒灰之辱况臣素探前載粗識大方  
謂事君之盡忠不忘於外知獲罪之無禱有私在天  
雖水折而猶東石可磨而弗撓謹當宣明厥守湔漑  
爾疵夙夜匪告于勞溜磷不昧其節河湍日皎有如

自誓之言弦勁韋柔參服攸聞之戒獲收涓効歸報  
洪私

謝復兼龍圖閣學士表

宋子京

臣某言臣伏奉制命授依前給事中翰林侍讀學士  
兼前件職者恩洗曩愆寵還故授緣榮得忭顧忝成  
慙竊念臣識局憊冥學機扞格久塵法從再直禁垣  
謬誤隳官徬徨去國遽瑗之老何止於知非石建之  
愚自甘於抵死永言孤跡俄軫上慈外停刺史之符



入引露門之籍用是晝分忘饋夜艾輟暝收擢短才  
詭成來効報深恩於骨肉掩餘誚於防川伏遇 皇  
帝陛下脩祀合宮均釐環海幸參圖始沆覩告成普  
賚侍祠例蒙扶秩尚念過雖一解職未盡歸再紆泥  
紵之褒仍廕霧圖之秘債膏沃朽破節延暉爰駕復  
驂漸習安行之謹傷禽已奮益懲虛墮之虞敢不祛  
拂蒙襟申尋典學服攸箴之訓匪懈厥躬有如日之  
明不忘於素涓分可効躡殞為輕

謝復職表

晁之道

肇新盛禮敷錫湛恩顧雖已廢之蹤均逮更新之澤  
職還書殿恩假祠宮曲被寵靈交揮感涕中謝伏念  
臣學非自得愚乃不移早講休嘉脩蒙識拔中罹憂  
患薦至顛躋屢見收於罪戾之餘迄無取於毫釐之  
効逮茲屏伏益悟奇窮災疾相仍寢閱歲晚之晚雲  
霄已邈敢希雨露之私忽此叨逢實踰過望此蓋伏  
遇 皇帝陛下逆釐神物均福海隅政用包荒施不



志遠致茲孤陋亦玷登庸竊食丘園深愧可陳之力  
傾心天日永懷未報之恩

謝復職表

樓大防

四年負譴尚玷從臣之階一扎疎恩復還士學之直  
周章拜賜感激為榮中謝伏念臣愚不知方志徒泥  
古頃更郡寄嘗辱賜環履玷朝行寢叨持橐代言批  
勅曾何有於論思約史自經每自慙於玩愒典銓未  
幾懷綬以歸尋力請於真祠仍寓班於內閣致煩言

之俯及甘暮景之宜休敢意矜存曲加拔拭特寬漢  
律申畀文謨深憐為養之懃又予祝釐之祿從天而  
下撫已尤驚茲蓋伏遇 皇帝陛下大度兼容至仁  
善貸謂臣親逢初政曾厠眾言之復陳察臣自訟宿  
愆不忍一青而終棄爰軫蓋惟之念未忘簪履之遺  
臣敢不祇戴寵光日思報稱奉百歲之母益增菜子  
之歡誦萬年之詩願效封人之祝

謝落致仕除翰林學士表

樓大防



代庖倖直又見卯年之周視草為真復塵乙夜之覽  
撫危蹤而何幸尋故步以知慙中謝竊以詞禁邃嚴  
宸居密邇有直諫多聞之益乃可預干論思為溫厚  
爾雅之文始宜司於播告鼓風雷之大號增日月之  
末光匪得英髦曷勝遴選伏念臣學惟直獵才乏菁  
華頃載筆於螭蚺尋演綸於鳳閣以先朝之門客為  
天子之私人方成王訪落之初顧聞國論逮漢家更  
化之始首被召音惟役閒一紀之餘且告老三時之

久茲以晚節衰殘之迹參內朝供奉之班念齊國世  
臣所存無幾歎元和之學士不謂重來茲蓋伏遇  
皇帝陛下思任舊人聿脩庶政朝綱日震急聞忠藎  
之言疆事未寧尤務坦明之制遂令庸陋亦玷招延  
臣敢不修葺蕪詞仰裨藻飾尚祈聖度俯矜草芥之  
微終俾凋年遂逐桑榆之晚

謝落致仕表

胡文定

蒲柳早衰難待引年之禮絲綸垂獎遽叨復仕之恩



拜命知榮省躬增惕中謝伏念臣本由質陋亦因數  
奇少也收科謂功名之可必壯而就養覺心事之多  
違既幸啜菽之歡仍抱采薪之戚欲彰纓而弗遂因  
斂轡以言歸江海飛鳧不為加少蓬蒿息鷄豈曰知  
還交遊莫記於寒溫形影相忘於贈答縱盜夜氣終  
歉前修敢圖藪澤之蹤猶動冕旒之聽此蓋伏遇  
皇帝陛下量兼覆載智燭隱微體萬物以同仁張四  
維而礪俗廣振湮淪之士用彰靖退之規誤及迂愚

曲加褒勉而臣衛生素拙嬰疹未觸念丹赤之欲輸  
恨筋骸之難強步趨緩縱目視昏花一壑風煙甘作  
養病之地五雲觀闕空懷拱極之心

謝起復知越州表

王豐父

起於苦塊付以麾符聖主異恩小臣難報中謝伏念  
臣衰遲最質憂患餘生方待盡於倚廬遂疏榮於分  
閫屢陳哀懇仰叩聽聞靡回從欲之仁特下發中之  
詔深惟小已曷稱殊私屬文陛之對揚奉邃旒之清



問念前朝輔相之久無易先臣助一時制作之功尤  
憐舊績記嘉祐受遺之事既元豐定策之勲肆宸筆  
之一揮破讒言於萬古金杯賜第玉篆題碑盡還他  
日之遺榮皆出至神之獨斷茲蓋伏遇 皇帝陛下  
舜躬總哲湯德寬仁郅室久幽輝之日采霜黃既槁  
振以春華重念臣昔歲奉親分符承之湖山再覩唯  
觸目以增悲父老重迎咸稽顙而太息鞭笞靡用獄  
訟頓清永念不忘之恩既踰高厚將伸欲報之德敢

憚糜捐

謝起復表

張乖崖

臣某言今月五日准中書劄子伏蒙 聖慈以臣所

讓恩令不行一依指揮給假候回日朝謝者皇私日  
麗睿渥春迴退惟賤微再切驚懼臣誠慶誠幸頓首  
頓首竊念臣處世無才逢時有幸既將身以許國兼  
得祿以榮親所恨者先臣卧疾之初闕於嘗藥所苦  
者丹旄出門之日不得攀棺遂瀝懇以祈天冀投誠



於終喪伏蒙 法天崇道皇帝陛下憐其迹性示以  
奪情殊常曲降於恩輝自遠許從於假告靈卉一慟  
庸知有後之人此外何求但覓報君之路無任感天  
荷聖激切屏營之至謹奉表稱謝以聞臣某誠榮誠  
感頓首頓首謹言

謝量移單州表

田表聖

臣錫言今月四日進奏院遞到官誥一通勅牒一道  
貢授單州團練副使散官勳如故者五色絲綸頒於

海上貳平官秩移近京師既拜命以欣榮彌省躬而  
感懼中謝伏以裡宗云畢慶賜遂行捨爵策勲方需  
惟新之澤赦過宥罪遐均作解之恩臣每念遭逢驟  
塵清切入居綸閣莫伸潤色之勞出典郡符有悞憂  
勤之旨俾從左宦尚未周星爰過嚴裡例該殊渥滄  
溟之上隨槎汎以將歸白日之暉覺葵傾而愈近散  
亡補報仰答休明

謝提舉崇福宮表

司馬溫公



臣光言伏奉勅命宜令再任提舉西京崇福宮者曩  
奏上陳始虞報罷黜聰垂聽亟沐頒恩祇荷寬優伏  
增兢悸伏念臣器非適用學不知方被遇三朝忝塵  
二禁紆天光之顧問侍經席之從容亦嘗委總憲司  
訖無報稱擢陪樞府不敢叨居剖竹雍都蔑聞於治  
效分臺洛邑幸養于沉疴仍再領於祠庭遂十更於  
歲籥頃自受命先帝俾刊舊聞逮陛下之纘圖發德  
音而繼志而臣携藁在外奏篇未經蓋簡冊之浩繁

致歲時之淹久雖官守無事慙四體之不勤而史學  
紬書寔寸陰之自惜懼先溝壑以負恩私久去班行  
顧其佗而無補坐糜祿廩嘗自訟而靡遑尚或無厭  
復求自便輒披私懇輕冒宸嚴豈謂 皇帝陛下大  
德包荒至明燭遠罔責再三之瀆曲垂開可之私蓋  
特出於異恩故不拘於盡法乾坤至大雖萬物皆遂  
其生雨露新霑或一夫獨被其澤惟顛愚之無狀容  
僥倖以滋多臣敢不深戒宴安祇勤夙夜畢精撰述



圖報生成

謝提舉萬壽觀兼侍讀表

張全真

臣某言準告授提舉萬壽觀兼侍讀者三年懷綬訖無外屏之榮一節賜環寵預邇英之列撫病軀之晚晚省舊學之荒唐雖屢瀆於聰聞曾莫回夫渙汗中謝竊以本朝崇講讀之制蓋容因事以建言上聖啟恢復之圖尤欲酌今而稽古自非學該流略識洞經權何以上廣睿明少裨政化臣之已試竄不自知初

誤辱於獎憐遂徧更於華要周旋二府每慙意廣而才疎師帥一方自笑心勞而政拙向非聖明之照燭久為讒基之甘心既遭譴訶復叨收召庀職琳館既無倥偬之勞敷經露門仍奉清閒之燕誰與為地命寔自天此蓋伏遇 皇帝陛下睿智有臨緝熙是力稟既高於天縱德更就於日新安用詩書陋高皇之不學先訪儒雅知光武之中興致茲孤藐之蹤獲備詳延之數受三鍾十粟終自媿於支離讀八索九丘



詎能追於倚相試圖自竭仰稱殊私尚期從欲之深  
仁俾遂授閒之素志

謝提舉臨安府祠霄宮任便居住表

張全真

臣某言昨知平江府以疾病奏乞官觀五月十九日  
準勅提舉臨安府洞霄宮任便居住即時望闕謝恩  
祇受交割府事與次官訖沈疴淹久屢控忱詞盛德  
包荒曲從私欲擇蕃宣之叢劇即隴畝之便安朝拜

茂恩夕有生意中謝伏念臣夙稟荒殘之質復乖衛

養之宜李廣數奇第知安分長卿多病每懼壞官方

聖主大有為之辰宜羣工思自盡於下亦圖策勵少

答恩私事與願違氣隨志索况以郡處股肱之要其

可冒居豈伊病在膏肓之間而能臥治獲伸危懼仰

恃至明此蓋伏遇 皇帝陛下治格允功武昭七德

責成近弼坐收破竹之功加惠舊臣深軫負薪之疾

故雖衰謝不替初終獲依晚景於松楸庶遂首丘之



願尚保餘生於蒲柳敢忘體國之心

謝提舉太平興國宮表

韓无咎

竊輔郡之符自貽謗戾賦真庭之祿俾道饑寒滋佩  
恩憐徒深感涕臣某誠惶誠懼頓首頓首伏念臣學  
知為己仕切慕官荷聖神識拔於眾人之中遭逢特  
異躡侍從周旋於六官之長忌嫉已多惟思樸直以  
盡忠詎敢窺覩而幸進竭因請外復玷承流謂抑強  
禁暴者刺史之常規若避事懷私者古人之深恥豈

慮中傷之銖積遂能搖動於風聞含沙幾類於短狐  
射市乃遭於強弩誣其怨望固以墜臣於淵深鱗以  
貪污直欲錮臣於聖世賴至仁之在上知羣下之隱  
情洞見肺肝保全軀命然臣恐懼閱三時之久羈窮  
懷十口之憂未容放跡於山林但有投誠於君父函  
蒙鴻造肆軫餘生縻廩稍於安閒貸馳驅於衰病茲  
蓋恭遇 皇帝陛下曲成萬物懷保小民力辨忠邪  
益恢張於治具大明黜陟庸丕變於士風將尋尺之



有施示蓋惟之罔棄察其既往許以自新臣敢不砥礪素衷激昂晚節無功而祿第為糊口之羞有命不渝尚切粉身之報

再任興國宮謝表

韓无咎

綴西清學士之班尚叨美職賦南紀祠官之祿益愧罔功祇荷恩憐莫知報塞伏念臣才為短拙分寔羈單圭竇革門竊有棲遲之幸竹筥木屐自嗟嫁送之頻顧榮遇之已多曾生涯之未給一昨坐謾於郡寄

繼蒙予食於真遊抱詩禮以傳家詎志所守課蕭鹽而玩歲僅活其孥逮茲秋滿之初復起年飢之慮飛而控地志宜遂於歸田窮則呼天心但祈於雨粟果勤洪造仍畀素餐茲蓋恭遇 皇帝陛下德本好生治先從欲體成周之歸厚草木依仁法炎漢之用寬昆虫咸懌肆紆臨照施及妾庸臣敢不奮勵愚衷激昂晚節枯魚未朽既均被於斗升老馬馳載或粗知於道路



三任興國宮謝表

韓无咎

謏材無用祇退伏於田廬明命有加乃荐叨於祠館  
荷天從欲揣分興慚伏念臣頃以戇愚誤蒙選拔典  
領三銓之重詎罄論思蕃宣兩郡之繁遽貽譏議一  
去闕廷之下六驚歲月之遷戴盆曷望於層霄徒懷  
眷遇伏慙自甘於末路倍費保全惟負郭之未充慨  
投簪之甚迫尚縻廩稍獲在安閒得象罔之珠益知  
味道受支離之粟滋愧匪功茲蓋恭遇 皇帝陛下

仁覆羣生春熙庶彙謂臣早更州縣宜膂力之寔愆  
憐臣久侍禁嚴亦姓名之屢記肆加存拊俾追飢寒  
臣敢不思報厚恩誓殫晚節餘生未泯儻為尺蠖之  
伸素志僅酬或致寸莛之効

謝提舉江州太平興國宮表 樓大防

分共理之符敢起一麾之嘆廩祝釐之祿終俞三請  
之辭盡出上恩獲申素志 中謝 伏念臣稟資至陋涉  
世最踈誤蒙三聖之知寔躡六官之長輟金華之講



而為金華之守曲從外補之求由學士之直而寓學士之班仍冒親除之渥已過家而上冢將叱馭以登途屬以母老易危暑行致疾羣醫俱試百口相驚亟上需章謂必嬰夫嚴譴首班溫詔乃許緩於官期感泣之深憂惶實切率更旬浹又露忱衷特寬方命之誅竟允奉祠之願仰隆私之過厚誠近代之所無去魯行遲難效齊邦之接浙報劉日短幸容李密之陳情茲蓋伏遇 皇帝陛下仁本愛人孝先錫類凡加

識拔舉無簪履之遺苟有懇祈俯詢芻蕘之賤使退安於貞館得娛侍於慈幃臣敢不銘著肺肝躬陳菽水况此塵勞之久少休疲曳之餘凱風自南獲遂奉親之樂眾星共北誓堅報主之心

謝除華文閣待制提舉西京嵩山崇福宮表

葉正則

昭示眷留未即野人之賤寵還舊職復忝近侍之榮姓名已没于朽陳命賜忽超於新特伏念臣資朴疎



信己之學之進趣合變之能昨一內忝論思浸成違  
忤監乎外專屏翰又負憂虞迄無顯効於盛時固合  
冥心於暮齒若乃羸扶短策緩駕卑車追憶悔尤濫  
軒裳之非據自嗟衰老指林壑以言歸惟賴天度并  
涵皇明隱燭獲從容而善退保優佚之令終至於躑  
躅徃愆寂寥久廢因茲告請遂曲軫於深慈悉與蕩  
除俾再通於禁籍尚糜素廩仍攝真遊為幸則然非  
願敢及此蓋恭遇 皇帝陛下躬秉上德化幾泰和

馭臣以貴為初美俗在寬之用哀憐末路蓋欲補其  
前修矜恤老窮不忍失其故步竊仰鴻私有如神功  
臣身未殞而年徂志空存而力盡惟曰愈重受恩之  
地然而莫知報國之方顛越是期兢慚罔措

謝除寶謨閣直學士提舉鳳翔府上清太平

宮表

葉正則

帝典近而易遵皇居親而愈切越踰次對啟沃前旒  
顧殘衰邁之蹤難副知憐之厚必以鑒觀治忽審擇



後先大化所單右文為咸藏奎圖之府建自太平直  
學士之官置從景德逮茲列聖並煥鴻名分命諸儒  
遽升華序博達今古從容規諷之間光識幾微補報  
職業之外臣力耕朽壤勛鑿枯泉空有胼手胝足之  
勞曾無曝背食芹之獻或進陪於閣職復嚴奉於仙  
靈淺陋則多潤色奚賴此蓋恭遇 皇帝陛下同天  
造化與世範圍萬物覩聖而作新一毫皆上所成就  
存留宿舊閔惜餘殘非必選賢示將假寵臣敢不寅

恭異數夕惕茂恩待滿令祠終償晚歲乞身之願試  
尋末學少殫平生致主之忠

聖宋名賢五百家播芳大全文粹卷三十四終







